

REGIONAL NEWS BULLETIN

Date – 26/04/2025 Time - 7:30 -7:40Hrs

HEADLINES (MORNING)

- Aizawl International Half Marathon-ah tukin khan Aizawl Mualpuia Rajiv Gandhi Stadium atangin mi sang 1 chuang an tlan tan.
- Aizawl Municipal Corporation chuan dan kalha kawng kama thil zuar thin te, hmun him zawka sawn hna a thawk mek.
- Union Home Minister hoin nimin khan Pakistan nena Indus Water Treaty neih mekchungchang ngaihtuah a ni.
- President Droupadi Murmui chuan Vatican city-a Pope Francis vuina tel turin nizan khan Rome khawpui a thleng.

<><><>

HALF MARATHON

Aizawl International Half Marathon chu tukin khan Aizawl Mualpuia Rajiv Gandhi Stadium atangin an tlan tan a, he intlansiaknaah hian hriat theih chinah mi 1075 an inziaklut a ni.

Aizawl International Half Marathon hi Sports & Youth Services Department, Athletic Federation of India leh Innovations India Pvt. Ltd. te tangkawp buatsaih a ni a, Intihsiakna hi hlawm thum a then a ni a, Half Marathon - km 21.1 a thui te; Open Race - km 10 a thui te bakah Fun Race - km 5 a thui te a awm dawn a ni.

Intlansiaknaa te l te kan corr in a kawm a, phurawm an tih thu leh hetiang a taksa sawizawina lam thil liantham buatsaih a ni chu an hlut thu an sawi a ni.

Intlansiakna tur kawng hi Aizawl khawpui chhuahlam World Bank Road-a a ni a. A bul tanna leh tawpna tur chu Rajiv Gandhi Stadium a ni ang. Tukin dar 6.30 atang khan intlansiak tur te hi category hrang hrang a hun inangloin, a indawtin tlantir an ni a, darkar 3 chhunga an tlan tur kawng tlan zo tura tih a ni. Kan corr report lo ngaithla ang.

Aizawl International Half Marathon hi Athletics Federation of India (AFI) pawmpui a ni a, an ni hian intlansiak pawh an rawn endik a. Intihsiak hi Larsap Gen (Rtd) Vijay Kumar Singh leh Chief Minister Pu Lalduhoma te'n patron an nih angin an uap dawn a ni.

<><><>

GOVERNOR

Larsap General (Rtd) Vijay Kumar Singh an thenawm ram Myanmar nena insumdawnna tur Kaladan Multi Modal Transit Transport Project hna thawh mekah India chuan a huamchhunga kawngpui a siamfel tawh a ti.

Nimina Mizoram University Auditorium-a Mizoram University din champhaphak leh Silver Jubilee lawmna hun a hmanpuinaah he thu hi sawiin Larsap chuan India chuan kawngpui siam fel tawh mahse lehlam ram ten an la zawh ve theih loh avangin harsatna a awm a, hei hi chinfel dan kawng a hmuh mai theih a beisei thu leh harsatna hrang hrang chinfela kawngpui siam zawh a nih chuan danglamna ropui tak a thlen a beisei tih a sawi.

Governor....

Larsap chuan Mizoram chu khualzin hip nana hmun duhawm ber pawl leh theihna nei sang, sanctuary pawh paruk lai nei a nih thu a sawi a. Heti zat sanctuary nei chung a khualzin hip kawnga Mizoram theihtawp a chhuah lo a nih chuan a hlawhchham dawn tih a sawi.

Larsap chuan Mizoram University in kum 25 a tling chu a lawmpui thu sawiin kum 25 kalta chhunga hmasawnna hrang hrang a hmuh chu thil chhinchhiahtlak tak a nih thu a sawi a. NAAC A grade a neih te leh NIRF top 100-a a tling leh India today ranking-a top 30 a ni thei chu lawmawm a tih thu a sawi a. Zirna mai bakah Mizoram University chu zirna in mawi leh chhelvel ram ngaw nei tha tak a ni leh zirna ina intihduhdahna, ragging awm miah lo a zirlai ten zirna an kalpui thei chu lawmawm a tih thu a sawi a ni.

MZU Vice Chancellor Prof. Dibakar Chandra Deka pawhin thu sawiin kum 24 chhungin Mizoram University chuan higher education-ah mite hriat nasa takin a hlawh hman a ni a ti a. India ram state dangte mai bakah ram dang atangin zirlai tam tak an neih thu sawiin tunah hian zirna huanga School of Law, Physical Education leh Sports Education lam hawng thar turin hma an la mek tih a sawi baw k a ni.

<><><>

AMC

Aizawl Municipal Corporation (AMC) chuan dan kalha kawng kama thil zuar thin te, hmun him zawka sawn hna a thawk mek a; a tah tawlin hmalak chhunzawm zel a ni dawn a ti.

He hmalakna hi Aizawl inrelbawlina a felfai zawk nan a hmalakna a ni tih AMC chuan a sawi a; mipuiten eitur tuihnai zawk an lei theih nan te, kawng kama thilzuarle leh a dawrtute himna tur te, kawngpui tawt lutuk tihziaawmna tur te a ni a, chuvangin hmalakna hian Aizawl mipuite thlawp a hlawh hle nia hriat a ni.

Venghlui Local Council leh Tuikual South Local Council huamchhunga kawng kama thil zuara thu zawng zawngte chu AMC Multi-Complex Tuikual South ah an thutna hmun buatsaih sak vek an ni a. Chuvangin, Venghlui Local Council leh Tuikual South Local Council huamchhunga kawng kamah street vendor tumah thu lui tawh lo turin AMC chuan hriattirna a lo chhuah tawh a, heihi khauh taka kenkawh chhunzawm a ni dawn tih an sawi a ni.

AMC chuan kawng kama dan loa thil zuarte survey hna a thawk chhonzawm zel dawn a, April ni 26, 2025 (inrinni) hian Chanmari Local Council leh Khatla Local Council huamchhung survey a ni ang.

<><><>

EDU FAIR

Zirlaite tana zir chhonzawm zelna tur chungchang hrilhfhahna leh buaipuina, Edu Fair chu nimin khan Aizawl Millenium Centre Rooftop ah buatsaih a ni a, vawiina chhonzawm a ni ang.

Edu Fair buatsaihtu zinga mi, Sape Events And Media Pvt Director - Sanjay chuan Mizo zirlaiten ramchhung hmun hrang hranga zirna leh zir tur awm an lo hriat zau zawk nan leh an hriatthiam theih nan Edu Fair chu buatsaih a ni a ti a, Pawl 12 zirlaite tan zirna sang zawk hriatchian tuma hmun hla tak pan ngai lovin, Aizawlah ngei ram chhung hmun hrang hranga University chungchang fiah leh chiang taka an zawhfiah theihna a nih avangin zirlaite chu Edu fair-ah hian kal theuh turin a sawm a ni.

Sanjay (Organiser)

Edu Fair-ah hian state hrang hranga private university leh central sorkar hnuaia zirna in 26 te an in phochhuak a, an zingah hian Mizoten an la hmelhriat vak loh, Indian army, Indian Airforce leh Indian maritime University te pawh telin Mizo thalaite tan sipaia luh theihna te an sawifiah a, Mizo thalai tam zawkte chuan sipaia luh dan hi an hriat loh avangin Mizoram tana vacancy awm te chu midangin an luah sak fo tih an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION HM

Union Home Minister hoin nimin khan Pakistan nena Indus Water Treaty neih mekchungchang ngaihtuah a ni a. Pahalgam firfiakte chetna avangin India chuan he inremna hi a titawp a ni. Nimin inhmukhawmah hian External Affairs Minister Dr S Jaishankar, Union Jal Shakti Minister C R Patil leh sawrkar official pawimawh tak takte an tel a ni. Union Jal Shakti Minister C R Patil chuan sawrkarin thutlukna chhinchhiahtlak tak siama Indus Water Treaty a titawp chu thil dik anih thu leh ram tana tha tur a ni a ti a. Indus lui tui far khat pawh sawrkarin Pakistan-a luh tir a remti lo tih a sawi bawk a ni.

Nimin vek khan Pahalgam firfiaka chetna avanga Pakistan mite visa tihtawp anih hnua Union Home Minister chuan state tin Chief Minister te chu an state

theuha Pakistan mite zawng chhuak turin a ti. Pakistan-a an let thuai theih nana hma la turin Union Home Minister chuan Chief Minister te hi a chah a ni.

<><><>

PRESIDENT @ ROME

President Droupadi Murmui chuan Vatican city-a Pope Francis vuina tel turin nizan khan Rome khawpui a thleng. President Murmu-i hian Vatican City ah hian ni 2 a cham ang. President hi Union Parliamentary Affairs Minister Kiren Rijiju, Union Minister of State for Minority Affairs George Kurian leh Deputy Speaker of Goa Legislative Assembly Joshua De Souza ten an tawiawm a. External Affairs ministry thuchhuah danin President Murmu-i hian Saint Peter-a Basilica-ah Pope Francis-a thlahna pangpar a dah a. Vawiina vuina inkhawmah a tel dawn bawk a ni. Puan tawh angin Pope Francis hi tun thla ni 21 khan a thi a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>